

Fatg enconuschientscha cun rodund 50 professiuns!

■ Durent la jamna da project dalla scola da Mustér ein la 5. e 6. classa sefatschentadas da professiuns en vischnaunca. La finamira ei stada da mussar allas scolars ed als scolars tgei gronda schelta ch'ei avon maun. Alla fin essan nus tuts stai surpri dalla variasiun enorma, malgrad che nus vein visitau mo paucas interpresas. Alla fin dalla scola primara dat ei buca donn da sefatschentar in techet cul futur e cunzun rimnar infomaziuns davart professiuns pusseivlas pigl avegnir. Aschia ein las duas classas sefatschentas durent ina jamna da rudien cul tema professiuns. Nus vein inagada vuliu saver tgei mistregns ch'ei dat ella regiun e tgei pusseivladads da far emprendissadi. Malgrad che nus vein visitau mo sis menaschis ei il diember da clamadas gia carschius sin rodund 50 differentas. Nus essan plinavon pertscharts ch'ei dat aunc in tschupel autras, ord motivs da temps eis ei denton buca stau pusseivel da visitar era quellas.



Igl interess per las differentas professiuns ei staus gronds.

MAD

15 professiuns mo en casa da tgira

Ralf Kock, il caucasa dil Center da sanadad Sursassiala, ha beneventau nus el niev baghetg a Mustér. Nus vein astgau contemprar la casa da sum tochen dem e vein aschia entupau diversas personas en lur clamadas. Ch'ei dat tgrunzas, cuschiniers, personal da higiena e per l'administraziun ha buca fatg surstar. Che nus vein denton aunc entupau ina fisioterapeuta, ina ergoterapeuta, gie schizun ina coiffeusa ha tuttina fatg impressiun als scolars. Aschia vein nus bandunau la casa spir impressiuns, beinsavend che davos ils mirs da quei baghetg sezuppan misteris ch'ei a biars buc enconuschents.

Sil plazzal da construcziun

La professiun dil miradur croda ualti spert sch'ins damonda zatgi tgei mistregns ch'el enconuschi. Quei ei era stau tier nus buc auter. Astgan ins denton visitar il plazzal da construcziun fetg special, numnadamein la construcziun dil mir da fermada a Barcuns e la renovaziun dalla centrala per producir forza electrica a Madernal, fa gia la dimensiun sezza respect. Pia Candinas dad Axpo Hydro Surselva ensemen cun Mario Hitz han capiu fetg bein da declarar als scolars las lavurs ed han era buc emblidau da menziunar las differentas professiuns ch'ei

inagada pusseivlas tier lur interpresa, denton era talas ch'ei oz da veser sil plazzal da construcziun. Considerond ch'ina ovra electrica vegn buca baghegiada mintga di ei la viseta dil plazzal stada historica. En in onn vegnin nus a turnar a Barcuns. Sin lu ei il mir alzau e las maschinas cun tut il personal che lavura leu a ver bandunau la val.

En las altezias

Interessanta e spir tensiun ei era la viseta tier las Penticularas Mustér stada. Il directur Ruedi Büchi ha menau nus tras il menaschi e declarau da rudien co quel funcziuna. Era el ha visau vi sillas persunas che lavuran tier els, cunzun davos las culissas, perquei che gest quellas ein savens buc enconuschentas. E daveras, enzanua ston las 70 persunas luvrar igl unviern. Aschia vein nus empriu d'enconuscher mistregns ualti novs, denton era tals ord la gastronomia, la vendita e l'administraziun. Interessants ei era il fatg ch'ei dat fetg bein ina differenza nua che tgei emprendissadi vegn absolvius. In vendider ella stizun da sport ei buc il medem sco quel ella stizun da virtualias. Il medem vala pigl emploiau mercantil.

Las Penticularas Mustér porschan adina puspei plazzas d'emprendissadi sils divers secturs e fan schizun ponderaziuns da slargar lur purschida. Ina professiun denton ei speciala e nus vein era gest giu igl emprendist Benjamin Solèr che ha presentau cun grond anim siu mistregn. Durent quater onns eis el sescolaus sco mechatronicher da penticularas. Ord

sias lavurs e sias raquintaziuns han ils scolars survegniu ina bun'investa davart quei fetg interessant mistregn.

A far skis

Enconuschentamein sesanfla era la firma Zai, producenta da skis d'alta qualitat, a Mustér. Era davos las culissas da quella interpresa havein nus astgau mirar e schizun luvrar! Simon Jacomet, il meinafatschenta, ha declarau la historia dall'interpresa e silsunter ha Marc Demont mussau a nus co ils skis vegnan fatgs. Sco punct culminont han ils scolars astgau gidar sez a producir in pèr skis. Cheutras han els fatg enconuschientscha cun divers materials ed era professiuns che sezuppan davostier. Las firmas da produciun da skis sestentan da scaffir in niev mistregn e tgunsch pusseivel vegnan futurs interessants a ver la schanza d'emprender quei mistregn in di a Mustér.

Sin viadi

Per inagada buc el tren, mobein tier las persunas che lavuran tier la viafier vein nus medemamein astgau cuchegiar viaden. En sesez, sco nies guid Erich Cadonau ha menziunau, ina schanza ch'ins ha pli e pli pauc el Grischnun perquei che las staziuns vegnan ni ein vegnidadas automatisadas e las persunas davos ils spurteglis svanidas. La staziun da Mustér ei zun attractiva ed in liug tschercau per luvrar perquei che duas viafier ed igl auto da posta partan dad in liug. Erich Cadonau ha dau in sguard anavos ella historia da sia professiun e nus essan vegni per-

tscharts cun bia ch'ei semidau ils davos onns. Markus Cadosch dalla scola Login che scolescha per incarica da pliras firmas da transport ils emprendists ha plinavon presentau la vasta paletta da scolaziuns pusseivlas – era tier nus a Mustér.

Metals, carbon e plastic da tuttas sorts

Fascinai da maschinas, electronica, computers, tut sutlingiau cun bunas explicaziuns dil responsabel dils emprendists dalla Distec SA, Marcus Jacomet, han ils scolars empriu d'enconuscher cunzun la lavur dil polimecanist. Entschiet la tura atras il menaschi vein nus ella halla da scolaziun dils emprendists, actualme in la pli moderna da quei gener en nies cantun. Naven dalla gliema entochen alla pli moderna maschina CNC cun tschun ischels han ils scolars saviu seperschuader tgei lavurs ch'ei in tuttas pusseivlas. Ina part dils 16 emprendists dil menaschi han mussau lur lavurs ed era las maschinas ch'els drovan. Silsunter vein nus visitau la produciun e viu la vasta paletta da products che vegnan fabricai a Mustér per l'aviativa, l'industria dad autos, la medischina e l'electronica.

Interessantas sentupadas – bunas experientschas

Igl ei curdau en egl che tuttas personas che han presentau lur menaschis ein d'ina vart loschas da lur professiun. Dall'autra vart han ellas era savens accentuau la medema constataziun: in mistregn mo per giuvens ni mo per giuvnas dat ei buc. Tut ils rodund 50 mistregns che nus vein empriu d'enconuscher san vegnir fatgs schibein da giuvnas sco da giuvens e nossas fatschentas ein schizun aviartas da ver giuvnas en mistregns plitost dad umens, resp. giuvens en mistregns plitost da dunnas. Il plaid dil specialist per professiuns da traffic e viafier Markus Cadosch sutlingiescha nossa constataziun: Sch'ins viva ella regiun da Mustér dat ein nundetg biars pusseivladads per emprender mistregns. L'elecziun ei gronda e stat avon porta. Ussa vul ei mo aunc dir da nezegiar la purschida ed elegger quei che fa plascher. Pigl agid, las informaziuns ed il temps mess a disposiziun engraziun nus a tuttas personas ed interpresas ch'ei segidadas cun nus durent quella jamna da project speciala a Mustér.

5. e 6. classa Mustér

Posiziuns dils scolars

A mi ha plaschiu che nus havein astgau baghegiar skis e che nus vein astgau mirar tuttas caussas. Per mei era tut cool ed igl ei stau ina fetg biala jamna da project.

(Chanel, 5. classa)

Jeu hai giu fetg bugen quella jamna da project, cunzun oz tier la Distec e tier la Viafier retica.

(Daniel, 5. classa)

... Aunc pli fetg ha plaschiu a mi dad ir a Barcuns e mirar co ei baghegiat il mir da fermada.

(Beatriz, 6. classa)

Il meglier ha plaschiu a mi da veser co la penticulara funcziuna.

(Julian, 5. classa)

A mi ha tut plaschiu bein, en special las penticularas e la Distec perquei che jeu s'interesseschel per tecnica e maschinas. La casa da tgira ei stada fetg speciala, cunzun la grondezia e co tut ei organi-

sau. Tut en tut la megliera jamna da project che jeu hai giu enzacu.

(Armon, 5. classa)

A mi ha quella jamna purtau bia informaziuns davart mistregns che jeu savevel buca ch'ei detti. Quei che las persunas declaravan era sco ina fontauna plein novas caussas ed informaziuns. Quella jamna ei stada fetg coola.

(Ilu, 5. classa)

Igl ei stau ina fetg biala jamna ed ei ha plaschiu a mi da veser ils mistregns.

(Laurine, 6. classa)

La jamna da project ha plaschiu a mi. Ils different mistregns han fascinau mei.

(Ricardo, 6. classa)

La jamna ei stada fetg interessanta. Jeu hai buca saviu ch'ei detti aschi bia mistregns en in menaschi.

(Robin, 6. classa)

reclama

Wochenend-Knaller!

Lammhüftli

2 Stück, Australien, im Kühlregal, ca. 400 g, per 100 g



40% sparen

2.67 statt 4.46

Capri-Sonne

• Multivitamin
• Safari Fruits
• Apfel-Kirsche + Zitrone
10 x 20 cl



über 40% sparen

2.80 statt 4.70/5.25

Parisiene

• Jaune
• Orange
• Rouge Super
Box, 10 x 20 Zigaretten



8.- sparen

72.- statt 80.-*

Auch als Einzelpackung erhältlich

Aktion

7.20 statt 8.-*

*Konkurrenzvergleich

Aktionen gültig am Freitag, 23. und Samstag, 24. Mai 2014 / solange Vorrat / Druck- und Satzfehler vorbehalten / jetzt abonnieren: www.denner.ch/newsletter

Einer für alle

DENNER